

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINSKI SUD U VISOKOM  
Broj: 41 0 K 100209 24 K  
Visoko, 24.04.2024.godine

## U IME FEDERACIJE BOSNE I HERCEGOVINE

Općinski sud u Visokom, po sudiji Avdiji Avdić uz sudjelovanje zapisničara Sejdić Džemile, u krivičnom predmetu protiv optuženog J.E. sina H. iz B., zbog krivičnog djela nasilje u porodici iz člana 222. stav 2. KZ FBiH, rješavajući po optužnici Kantonalnog tužilaštva-tužiteljstva Zeničko-dobojskog kantona broj T 04 0 KT 0054637 23 od 12.12.2023.godine, nakon zaključenog glavnog javnog pretresa, održanog dana 24.04.2024.godine u prisustvu Kantonalnog tužitelja Jelene Bošnjak i optuženog J.E. i branioca optuženog Advokat Lemeš Tarika iz Visokog, na pretresu za objavljivanje presude, u prisustvu kantonalnog tužitelja, optuženog i branioca optuženog, dana 24.04.2024.godine, donio je i javno objavio:

### PRESUDU

OPTUŽENI: J.E., sin H. i majke S. rođene A., rođen ... u S., općina C., nastanjen u mjestu P. bb, općina B., pismen, sa završenom srednjom školom, po zanimanju plinski vodoinstalater, nezaposlen, neoženjen, lošeg imovnog stanja, Bošnjak, državljanin BiH, JMB: ..., osuđivan presudom Općinskog suda u Visokom broj: 41 0 K 093758 22 Kps od 03.11.2022. godine za krivično djelo iz člana 293. stav 1. KZ F BiH, na kaznu zatvora u trajanju od tri mjeseca, uslovno jedna godina,

### KRIV JE

što je,

dana 25.08.2023. godine, oko 16:00 sati, u B., nasiljem, drskim i bezobzirnim ponašanjem ugrozio mir, psihičko i fizičko zdravlje svoje majke J.S. sa kojom živi u zajedničkom domaćinstvu, u porodičnoj kući na adresi P. bb, na način da je istoj psovao majku, oca i sestre, a zatim je šakama četiri puta udario u glavu, a nakon toga je uzeo kuhinjski nož i zaprijetio joj riječima: „Daj mi pare ili ću te sad ovdje ubiti“, iako je bio svjestan da ovako drskim i bezobzirnim ponašanjem ugrožava mir, duševno i fizičko zdravlje svoje majke, što je i htio, a što je sve kod J.S. izazvalo osjećaj straha i nesigurnosti,

dakle, nasiljem, drskim i bezobzirnim ponašanjem ugrozio mir cjelovitost, psihičko i fizičko zdravlje člana svoje porodice sa kojom živi u zajedničkom domaćinstvu,

čime je počinio krivično djelo nasilje u porodici iz člana 222. stav 2. KZ F BiH.

Pa sud optuženom na osnovu istog zakonskog propisa: te na osnovu članova: 42., 49. i 62. KZ FBiH, i z r i č e

### USLOVNU OSUDU

Kojom se optuženom za počinjeno krivično djelo utvrđuje kazna zatvora u trajanju od 6(šest)mjeseci, a koja se neće izvršiti ako optuženi za vrijeme od 2(dvije)godine ne počinu novo krivično djelo.

Na osnovu čl.202 stav 4 ZKP FBiH optuženi se oslobađa plaćanja troškova krivičnog postupka i isti padaju na teret budžetskih sredstava suda.

### Obrazloženje

Kantonalno tužilaštvo Zeničko-dobojskog kantona (u daljem tekstu KT ZDK), optužnicom broj T 04 0 KT 0054637 23 od 12.12.2023.godine, optužilo je J.E. , zbog krivičnog djela nasilje u porodici iz člana 222. stav 2. KZ F BiH, (Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), (dalje u tekstu KZ FBiH).

Optužnica je potvrđena od strane sudije za prethodno saslušanje ovog suda dana : 19.12.2023.godine . Dana 05.03.2024.godine na ročištu o izjašnjenju o krivnji, optuženi J.E. se izjasnio da nije kriv za krivično djelo koje mu se stavlja na teret.

Na glavnom pretresu održanom 24.04.2024.godine prije izvođenja dokaza, optuženi J.E. priznao je krivnju za krivično djelo nasilje u porodici iz člana 222. stav 2. KZ F BiH,, a njegovo priznanje je prema ocjeni ovog suda u suglasnosti sa dokazima u koje je sud izvršio uvid i to: zapisnik o saslušanju svjedoka-oštećene J.S. PS Breza broj: 08-02-09/3-2-276/23 od 25.08.2023. godine, zapisnik o saslušanju svjedoka J.S2. PS Breza broj: 08-02-09/3-2-320/23 od 29.09.2023. godine,- zapisnik o uviđaju PS Breza broj: 08-02-09/3-2-72/23 od 25.08.2023. godine, nalaz i mišljenje ljekara specijaliste JU Dom zdravlja Breza, Služba hitne medicinske pomoći broj: 7453 od 25.08.2023. godine na ime J.S., nalaz i mišljenje JU Kantonalna bolnica Zenica Odjel radiološke dijagnostike od 25.08.2023. godine na ime J.S.; nalaz i mišljenje JU Kantonalna bolnica Zenica Odjel za urgentnu medicinu od 25.08.2023. godine na ime J.S., nalaz i mišljenje JU Kantonalna bolnica Zenica Odjel interne medicine sa hemodijalizom-prijemna ambulanta od 25.08.2023. godine na ime J.S., rješenje Općinskog suda u Visokom broj: 41 0 Pr 098878 23 Pr od 25.08.2023. godine i izvod iz kaznene evidencije za osumnjičenog J.E. MUP Kantona Sarajevo, Uprava policije od 04.09.2023. godine.

Branitelj je izjavio :optuženi moli sud da prilikom izricanja sankcije ima u vidu olakšavajuću okolnost, to je prije svega današnje priznanje optuženog, činjenicu da nije ranije osuđivan za ovu vrstu krivičnih djela, njegovo loše imovno stanje, nezaposlenost, kao i činjenicu da je nakon ove situacije pomirio se sa ocem i majkom i da žive zajedno u domaćinstvu. Također optuženi je osoba narušenog zdravstvenog stanja, jer je u saobraćajnoj nezgodi 2019.godine teško povrijedio ruku i nogu i očekuju ga još dvije operacije kojima će se popraviti motorika ruke i noge. Također optuženi se kaje, srami zbog počinjenog, a što će i sam reći sudu.

Optuženi u završnoj riječi izjavio da se kaje za počinjeno, imao je je problema, udes, dugo vremena sam se liječio pio tablete išao neuro- psihijatru. Obećaje da se to više neće sigurno ponoviti, jer ga je stid svega što se desilo. Sad su odnosi sa roditeljima dobri, kao što je i trebalo biti. Molim sud da me oslobodi plaćanja troškova postupka, jer sam nezaposlen i nemam nikakvih primanja za život.

Sud je ovo priznanje krivnje optuženog ocijenio kao jasno, iskreno i nedvosmisleno ničim uslovljeno tako da je priznanje optuženog u suglasnosti sa materijalnim dokazima, naprijed navedenim, u koje je sud izvršio uvid, na osnovu čega van svake sumnje proističe da je optuženi ostvario sva bitna obilježja bića krivičnog djela nasilje u porodici iz člana 222. stav 2. KZ F BiH.

Po ocjeni suda optuženi je navedeno predmetno krivično djelo počinio sa direktnim umišljajem jer je bio svjestan svog djela i htio je njegovo izvršenje, a sud je utvrdio da je optuženi prilikom izvršenja krivičnog djela bio uračunljiv, jer predloženim dokazima nije dovedena u sumnju mogućnost optuženog da shvati značaj svog djela i da upravljaju svojim postupcima u vrijeme izvršenja djela, te su se u njegovim radnjama stekla sva bitna obilježja bića krivičnog djela nasilje u porodici iz člana 222. stav 2. KZ F BiH.

Prilikom izricanja krivično pravne sankcije sud je cijenio optuženom J.E. kao olakšavajuće okolnosti činjenicu da je priznao krivičnog djela koje mu se stavlja na teret, čime je u mnogome doprinjelo utvrđivanju činjeničnog stanja i skraćanju krivičnog postupka, kao i okolnosti koje je optuženi naveo u svom iskazu prilikom priznanja krivnje, te činjenicu da optuženi je do sada osuđivan, ali ne za istovrsno krivično djelo. Dok je od otežavajućih okolnosti sud uzeo u obzir samu prirodu i vrstu krivičnog djela koje mu se stavlja na teret. Cijeneći utvrđene okolnosti na strani optuženog, sud je optuženom J.E. , za navedeno krivično djelo utvrdio kaznu zatvora u trajanju od 6 (šest) mjeseci , koja kazna se neće izvršiti ako optuženi u roku od 2 (dvije) godine ne počini novo krivično djelo. Po mišljenju ovog suda izrečena sankcija srazmjerna je stepenu odgovornosti optuženog i težini počinjenog krivičnog djela koje mu se stavlja na teret, te će se istom postići svrha kažnjavanja, kako sa aspekta generalne, tako i specijalne prevencije predviđena članom 42. KZ FBiH.

Na osnovu čl.202 stav 4 ZKP FBiH optuženi se oslobađa plaćanja troškova krivičnog postupka i isti padaju na teret budžetskih sredstava suda.

Sudija  
Avdija Avdić

**PRAVNA POUKA:**

Protiv ove presude dozvoljena je žalba Kantonalnom sudu Zenica u roku od 15 dana po prijemu iste, a žalba se podnosi ovom sudu u tri primjerka.